

欽
定
全
唐
文

欽定全唐文卷一百二十三目錄

周太祖 二

爲漢隱帝發喪勅

收瘞暴骸勅

令諸道勸課耕桑勅

宣諭徐宿二州勅

宣諭晉絳慈隰諸州軍民勅

前資官準聽外居勅

定赴任程期勅

禁沿淮州縣軍鎮侵略淮南勅

定府州從事等當直人力數勅

放散諸州抽差勅

均祿勅

給還籍沒田產勅

禁濫薦勅

盛夏決滯獄勅

答竇貞固進晉朝實錄勅

貶監察御史劉頊復州司戶參軍勅

定催科賞罰勅

撫恤沿邊流民勅

併三銓爲一勅

禁越訴勅

討慕容彥超勅

令諸道勸課農桑勅

諭金州屯戍兵士勅

授錢宏俶天下兵馬元帥勅

恤刑勅

贈閻宏魯崔周度官勅

禁吏民舉留守牧勅

宣李穀入見勅

改定鹽麴條法勅

令黃知筠往兗州收埋暴骨勅

更定招安戶口賞例勅

定皮革稅勅

欽定全唐文卷一百二十三

周太祖 二

爲漢隱帝發喪勅

漢高祖爲義帝發喪魏明帝正禪陵尊號一時達禮千古
所稱況朕久事前朝常參大政雖遷虞事夏見奪於羣情
而四海九州咸知予夙志宜令所司擇日爲故主舉喪仍
備山陵葬禮

收瘞暴骸勅

含幽育明哲后法之而致理掩骼埋胔賢主著之爲令猷

欽定全唐文

卷一百二十三

周太祖

今寶祚惟新璿璣在御踵姬周之至德體虞舜之深仁屬
三靈改卜之秋當五兵銷偃之際或墳塋無主幽窆毀發
於斂斂或戰陣亡身遺骸暴露於原野旅魂無託言念堪
歎應天下州縣管界內有墳墓被開發者無人爲主本界
官吏量與掩閉勿令漏露或戰場郊野有暴骸露骨亦仰
收拾埋瘞以聞

令諸道勸課耕桑勅

農桑之務衣食所資一夫不耕有艱食之慮一婦不織有
無褐之虞今氣正陽春候當生發宜勤用天之業將觀望

歲之心應諸道州府長吏宜勸課耕桑以豐儲積編民樂業仍倍撫綏

宣諭徐宿二州勅

朕猥以寡薄肇創基圖思康濟於兆民推恩信於天下庶幾致理漸至平寧楊溫等比事藩維止爲小校妄生猜懼輒閉城門朕亦累賜勅書開懷示信諭以安危之道俾全忠孝之名亦繼有文字進呈止望朝廷恕舍朕念端倪未審之際事勢使然彼旣無心豈忍加罪是以授之郡牧許以自新而不體優恩尚敢拒命執迷罔悟但作遷延今已

金史卷之三十三
差兵士往彼攻取期於旦夕必易盪平汝等皆居封境之中各懷仁義之節況屬陽和之候方當農養之時暫駐兵甲固無騷擾宜思齊力安家

闕

宣諭晉絳慈隰諸州軍民勅

朕早事劉氏共立漢朝當高祖寢疾旣危朕與揚州史宏肇於御牀之前同受顧託嗣君旣立叛亂繼興朕討平河中克寧關內敢言勞苦貴保宗祧自鎮鄴都復當戎寄忘食廢寢夜思晝行固護邊疆訓齊師旅憂時憂國盡節盡忠不期羣小連謀蔽惑幼主忽於內殿併害大臣朕方在

外藩亦遭讒構密降宣命潛遣行誅諸將知此無辜乞除
君側之惡遂與將士同赴闕廷凶豎計窮迫害幼主朕遂
奏太后請立劉贊比候到京方議冊立便值河北告急契
丹內侵遂領大軍徑赴救援自澶州起程北去輜重相次
先行旗隊纔移軍情忽變喊聲動地事勢莫知攢集戈矛
請朕爲主逃脫無地扶擁入京內外臣僚藩岳侯伯表章
繼至推戴益堅勉副羣情尋登大位照臨之內罔不傾心
不謂北京留守劉崇顯有包藏輒萌僭竊散飛文字誑惑
人民騷動一方酷虐萬姓差點丁壯率掠貨財殺戮無辜

誅剝難狀況劉崇自居藩鎮唯務貪求刻削軍都增添稅賦千里之內民不聊生今則又作猖狂更加暴虐謂人情可以詐取謂天命可以僭求顛越如斯不亡何待朕方輯寧區宇拯救黔黎見舉大軍往平微孽爰念河東管界皆是朕之生靈被此凶殘深懷軫惻即候收復城壘當議減放稅租內外軍民並與洗滌更在沿邊藩鎮明宣朕懷接界戶人勿令侵擾其邊界城池已令修戢要辨奸細切須隄防安撫生民以副朕意

前資官準聽外居勅

朕祇膺景命奄有中區每思順物之情從衆之欲將使照臨之下咸遂寬舒仕宦之流自安進退往者時有拘忌人或滯留所在前資並遣赴闕輦轂之下多寄食僦舍之人歲月之間動懷土念家之志宜循大體用革前規應諸道州府有前資朝官居住如未赴京不得發遣其行軍副使已下幕職州縣等官得替求官自有月限年月未滿一聽外居如非時詔徵不在此限但闕員有數入官者多苟無定規必生躁競凡爾進取知朕意焉

定赴任期期勅

自前朝廷除官銓司選授當其用闕皆稟舊規近聞所得
官人或佗事阻留或染疾淹駐始赴任者既過月限後之
官者遂失期程以至相沿漸成非次是致新官參謝欲上
舊官考秩未終待滿替移動逾時日凋殘一處新舊二官
在迎送以爲勞必公私之失緒今後應諸道州府錄事參
軍判司縣令主簿等宜令本州府以到任月日旋具申奏
及報吏部此後中書及銓司以到任月日用闕永爲定制
其見任州縣官限勅到仰便具先到任月日一齊分析申
奏及報吏部其有諸色事故及丁憂并請假十旬滿日亦

仰旋具申奏兼報吏部其新受官準令式給程限外如不到本任參上致本處無憑申奏到任月日便仰吏部同違程不上收闕使用其諸見闕亦不得差官攝權輒便隱留如違勅條罪在本判官錄事參軍孔目官已下

禁沿淮州縣軍鎮侵略淮南勅

沿淮州鎮朝廷比與淮南素非仇怨互分疆土各有人民商旅往來比無阻滯兵師屯戍自守關防其自近朝稍聞多事煙塵時動生聚無聊爰當開創之初每求安靜之道沿淮千里所宜禁暴戢兵比屋小民漸冀息肩樂土庶期

歲月馴致和平凡我疆場之臣當體宵旰之念應沿淮州縣軍鎮今後自守疆土鈐轄兵士鄉軍不得縱一人一騎擅入淮南地分稍或違令不宜輕恕商旅行李經過輒不得妄致邀難如聞滯留必行勘罪更仰指揮沿邊巡檢止絕賊盜務在道途清肅人戶謐寧詔到速散行管界凡津要口鋪可丁寧曉告

定府州從事等當直人力數勅

職當參佐位列賓僚苟無職馭之人頗異築臺之禮雖事因改易而理未酌中宜降明文庶永爲制副留守節度副

使行軍兩京少尹留守判官兩使判官並許差定當直人力不得過十五人節度推官防禦團練軍事判官不得過十人諸府少尹書記支使防禦團練副使不得過七人並取本廳舊當直人力數少不及新定數目只仰依舊人數差定仍令逐處係帳收管此外如敢不遵條制多有占差額外影占人戶其本官當行朝典

放散諸州抽差勅

前朝於諸州府差散從親事官等前朝創置蓋出權宜苟便一時本非舊貫近者徧詢羣議兼採封章具言前件抽

差於理不甚允當一則礙州縣之色役一則妨春夏之耕
耘貧乏者困於供須豪富者幸於影庇既爲煩擾須至改
更況當東作之時宜罷不急之務其諸州所在差散從親
事官並宜放散自逐田農自去年四月已前州縣元管係
人數一切如舊其遞鋪如已前招到者且仰仍舊今後更
不得招召其諸處場院並不得影庇兩稅人戶所有河北
諸州及澤潞晉絳慈隰解等州於先差散從親事官內選
到弓箭手只且留在本州管係其餘放散

均祿勅

牧守之任委遇非輕分憂之務既同制祿之數宜等自前者富庶之郡請給則優或邊遠之州俸料素薄以至遷除之際擬議亦難既論資序之高卑又患祿秩之升降所宜分多益寡均利同恩冀無黨偏以勸勲效今重定則例諸州防禦使料錢二百貫祿粟百石食鹽五石馬十匹草粟元隨三十人衣糧團練使料錢一百五十貫祿粟七十石食鹽五石馬十匹草粟元隨三十人衣糧刺史料錢一百貫祿粟五十石食鹽五石馬五匹草粟元隨二十人衣糧仍取今年五月一日後到任者依新定例支其已前在任

者所請如故

給還籍沒田產勅

朕臨御以來憂勤無怠慮庶政之尚闕恐蒸民之未安寢食不遑夙宵若厲早歲雍岐連叛兵革薦興迨至討平可知傷弊誠念負罪之黨尋以誅夷亡命之徒近皆滌蕩則被釋放者皆爲赤子經釐革者悉是平人雖性命之永全在生涯之何著興言軫憫未嘗去懷其京兆鳳翔府先因攻討之時及收復之後應有諸色犯罪人第宅莊園店舍水磴曾經籍沒及本主未歸者已宣下本道却給付罪人

骨肉爲主仍仰逐處嚴切指揮勿令所繇衷私闌恡邀求
資金庶令存濟用副朕懷

禁濫薦勅

朝廷設爵命官求賢取士或以資敘進或以科級升至有
白首窮經方階一第半生守選始遂一官是以國無幸民
士無濫進近年州郡奏薦多無出身前官或因權勢書題
或是衷私請託旣難阻意便授真恩遂使躁求徼倖之徒
爭遊捷徑辛苦孤寒之士盡泣窮途將期激濁揚清所宜
循名責實凡百有位當體朕懷今後州府不得奏薦無前

官及無出身人如有奇才異行越衆超羣亦許具名以聞
便可隨表赴闕當令有司考試朕亦自更披詳斷其否臧
俾之升黜庶使人不謬舉野無遺才冀廣德人以資從政

盛夏決滯獄勅

朕肇啟丕基躬臨庶政深慕泣辜之道以宏恕物之心今
則方屬炎蒸正當長養黃沙繫繫宜矜非罪之人丹筆重
輕切戒舞文之吏凡有獄訟不得淹延務令囚絕拘留刑
無枉濫冀叶雍熙之化用符欽恤之情應京都諸道州府
見禁人等宜令逐處長吏限勅到應有獄囚當面錄問事

小者便須遣決案未成者即嚴切指揮疾速勘決據罪詳斷疏放勿令停滯及致冤抑庶召和氣俾悅羣心

答竇貞固進晉朝實錄勅

貞固等羣書覩奧直筆紀言成一代之明文繼百王之盛典豈特洪纖靡漏抑亦褒貶有彰將播無窮永傳不朽歎重褒美頃刻不忘

貶監察御史劉頊復州司戶參軍勅

頊名升通籍官列憲司凡繫所爲尤宜知禁不能爲子諍父而乃離局侵官宜謫掾於方州俾省愆於終日

定催科賞罰勅

秋夏徵賦素有常規苟或催督及時官吏奉法自然辦及
不至愆期前後所行條流頗甚苛細殊虧大體且類空言
宜有改更以示懲勸起今後夏秋徵賦省限滿後十分係
欠三分者縣令主簿罰一百直勒停錄事參軍本曹官罰
七十直殿兩選孔目官罰七十直降職次本孔目勾押官
典決停本判官罰七十直若係欠三分已上奏取進止係
欠三分已下者等第科斷殿罰其州縣徵科節級所由委
本州重行決責其本判官錄事參軍本曹官孔目勾押官

典取一州都徵上比較縣令主簿即本縣都徵上比較分
數州縣官吏等各處員僚司分寄任所徵賦稅乃是職司
苟或慢公何以食祿將勸能吏仍立賞科應諸州縣令錄
佐官在任徵科依省限了絕者至參選日若是四選已上
者減一選若不及四選者則與轉官其已前所行賞罰條
流一切不行

撫恤沿邊流民勅

朕以沿邊百姓適因災沴遂至流亡拋棄鄉園扶攜老幼
未有安泊之地深懷愍念之心宜切撫綏庶令存濟其邊

金匱要略卷之三
界流移人戶差使臣與所在官吏撫恤安泊其滄景德管
內甚有河淤退灘之土蒿萊無主之田頗是膏腴少人耕
種可令新來百姓量力佃蒔只不得虛占土田有妨別戶
居止如是願在別管界內居住者亦聽取便所在關津口
岸不得阻滯如邊界有親識可依亦聽從便仍人給斗粟
委三司支給候安泊定取便耕種放差稅

併三銓爲一勅

選部公事比置三銓所有員闕選人分在三處每至注擬
之際資敘難得相當況又今年選人不多宜令三銓公事

併爲一處委本司長官通判同商量可否施行所冀掄選
得中銓綜有序其吏部尚書銓見闕宜差禮部尚書王易
權判

禁越訴勅

致理安邦必先刑政分爭辨訟各有職司內則臺省官僚
外則州縣曹局共承寄任同體憂勤苟衆務之有條則蒸
民之無怨向來百姓訴訟不得越次訴論近日繼有便詣
朝廷不經州縣宜再止絕免致踰違今後百姓凡有訴論
及言災沴先訴於縣縣如不治即訴於州州治不平訴於

觀察使或斷遣不當即可詣臺省如或越次訴論所司不得承接如有抵犯準律科懲其訴事文狀或自手寫或是雇人並於狀後書其名姓並住止處所如無人寫狀許過白紙事條並須爲已如或容訴是挾阿私鞠得其情必議嚴斷若所經處所斷遣不平致詣朝廷長史推司當行謫罰

討慕容彥超勅

兗州節度使慕容彥超不知恩信輒恣凶狂北則勾喚劉崇南則結連淮寇劫掠鄰縣邀截路行差補元隨主持鎮

務一向殘害生聚百般誅斂貨財贍養姦凶圖謀悖亂割
剝之苦所不忍聞朕每爲含容欲全終始近據東西諸處
申奏慕容彥超徧於管內抽點鄉軍人戶不伏追差逐處
殺劫鎮將又懼挾讐屠害悉是逃竄山林言念衆多盡能
忠孝嗟我赤子遇此亂臣方當寒凍之時可想艱辛之狀
須行弔伐以救孤危今差侍衛步軍都指揮使曹英等統
領大軍往彼問罪已指揮告報諸軍入兗州界並不得下
路村舍斫伐桑棗驅虜牛驢毀拆舍屋發掘墳墓如有犯
者便行軍令候至城下委曹英散行指揮安撫人戶兼勒

諸縣令依舊勾當公事仍差使臣於兗州四面邊界招喚
百姓令著營養如有惡黨接便爲非者即就彼處斷其人
戶不得更於堡塞團集仍勒縣鎮官員節級明具朝廷指
揮告報勸課農桑無失春計兼自前有兗州管內人戶被
慕容彥超迫虜誑惑誘引見在州城內者及有元在兗州
充職人等必是逐人各有骨肉房親在城今官中一切不
問宜令州縣倍加安撫勿縱節級所繇衷私恐嚇若有全
家並在兗州城內者或有莊田店宅及諸般物產如元有
人勾當勒一切仍舊若無人主張即委鄰人簡較看守勿

信任人妄有占據及毀拆斫伐候收復城池分付本主一
夫作亂萬姓何辜興言疚懷傷歎無已故茲告諭各令聞
知

令諸道勸課農桑勅

勅諸道府州吏六府允修無先重穀九扈分職厥惟勤農
今則東作聿興西成係望我有羣后政在養民苟不懈於
行春諒倍登於多稼卿分憂事任道俗廉平樹以風聲靡
如草偃必汙萊之地並作百廛游惰之民咸勤四體用洽
帶牛之化更彰棲畝之謠眷倚之懷寤興斯切詔到卿可

散下管内勸課鄉縣百姓依時耕種栽接桑棗勿縱游惰
務在精勤

諭金州屯戍兵士勅

一昨慕容彥超結連草寇毒寇蒸民側近縣鎮鄉村無名
脅從屠害人神憤怒須議討除朝廷已發大軍往彼攻取
汝等屯戍邊境勞苦經時言念忠勤不忘寤寐所有汝等
家口並在寬州城內屬此背違想皆憂念在朕誠意暫不
弭忘已降宣命指揮曹英候收復城池日晝時選得力負
寨部領兵士率先入城占據本營安撫逐人骨肉家口不

得輒有驚恐

授錢宏倣天下兵馬元帥勅

古之王者啟邦經野分職設官疇建殊庸懋昭大德我有
重臣世膺王爵雖任一方之帥未超極品之榮漢法非劉
不王唐制元帥爲重茲惟大任寧授非人用錫名藩永扶
昌運咨爾檢校太師守尚書令上柱國吳越國王錢宏倣
乾坤間氣海嶽孕靈爲民物之綱維實朝廷之藩屏承家
保國奕世羨堂構之賢治亂持危四方推英豪之主梯航
時登乎丹陛兵革靡及乎蒼生才足以尊主而庇民德足

以移風而易俗肆歸建極不替忱誠有齊桓尊周之心而忠義式逾乎齊有晉悼駕楚之略而功名不忝乎晉建之都督則百辟允諧使之元戎則三軍用命表海受一方之寄真王啟萬戶之封匪爾令名曷兼衆職爾其不墜善始永圖令終承我履言毋忝厥位可特授天下兵馬都元帥餘如故

恤刑勅

朕以寡昧獲主黎元將以召天地之和每思去刑政之弊寅恭於此宵旰爲勞今以節及長羸時臨暑熱耕農之戶

蠶麥將忙宜於獄訟之間特示憂勤之旨應有刑獄切慮淹滯詔至所有重輕繫囚疾速勘鞫斷遣無令冤抑慮有淹延若輕罪畫時決遣其婚田爭訟務內勿治若事要定奪即須疾速區分若斷遣不平許人糾告官典必議徵斷

贈閻宏魯崔周度官勅

閻宏魯崔周度死義之臣禮加二等所以滲漏澤而賁黃泉也爾等貞節昭彰正容肅厲以從順爲己任以立義作身謀履此禍機併罹冤橫宜伸贈典以慰貞魂宏魯贈驍衛大將軍周度贈祕書少監

禁吏民舉留守牧勅

諸州縣吏民緇黃繼來詣闕舉留刺史縣令牧宰之任委
寄非輕繫蒸庶之慘舒布朝廷之條法若廉勤奉職撫字
及民自有政聲達於朝聽何勞民庶遠致舉留旣妨農養
之時又耗路途之費所宜釐革免致勞煩今刺史縣令顯
有政能觀察使審詳事狀朝廷當議獎昇百姓僧道更不
舉請一切止絕

宣李穀入見勅

昨迴批答已丁寧宣諭卿所掌至重代難其人苟濟事權

何勞動見朕於便殿待卿可暫入來與卿款敘

改定鹽麴條法勅

承前所立鹽麴條法每犯至少盡處極刑近年以來抵罪甚重兼以邑居人戶隨稅請鹽既不許將入城隍又不容向外破賣立法之弊一至於斯爰自新朝尚沿舊制昨因鄭州按獄備見百姓銜冤既詳斷之踰違亦條令之疑誤觀茲深刻須議改更庶令輕重得中兼復上下知禁國計之重立法爲先貴在必行何須過當凡鹽麴犯一斤已下至一兩杖臀十七配役一年五斤已下一斤已上杖脊二

十役三年五斤已上杖死之煎鹹鹽犯一斤已下杖脊二十役三年一斤已上杖死之若捉獲鹹土及水煎成鹽了秤之定罪顆鹽末鹽各有界分如界分相侵同犯鹽罪論鄉村所請蠶鹽只自充用不得將入城邑村坊博易貨賣如違同犯鹽論所請蠶鹽處道路津鎮須驗公憑凡賣鹽麴並須官場官務若衷私興販同犯鹽麴例論官場官務有羨餘鹽麴並盡底納官如輒將貨賣同犯鹽麴論凡鹽戶酒戶衷私與場官院官買賣同犯例論凡鹽麴同情共犯若是卑幼骨肉奴婢同犯只罪家長主者不知情只罪

造意者其餘減等凡城郭人戶係屋稅鹽並於城內請給
若外縣鎮郭下人戶亦許將所請鹽歸家供食即本部官
據人戶合請數都計於俵場請數點檢入城不得因便帶
入其郭下戶或城外有莊田合並戶稅者亦本處官預前
分說勿令逐處都請凡鹽麴鹽鹺隨處地分節級專切捉
搨如透漏必重科斷其告犯鹽麴人死罪者賞錢五十千
文不死罪賞三十千文以本處係省錢充故斟酌輕重立
此科條宜令三司施行其中有合指揮件目隨事處分以
聞

令黃知筠往兗州收埋暴骨勅

兗州自逆臣盜據多有殺傷永惟葬朽之仁式示掩骸之義宜令樂院使黃知筠往兗州收暴露骸骨於高地爲壙埋葬祭奠以聞

更定招安戶口賞例勅

朝廷命官分治州縣至於招安戶口增益稅租明立賞科以勸勤吏近朝釐革雖有勅文俱未適中難仍舊貫晉代則傷於容易啟僥倖之門漢朝則過於艱難妨進趨之路旣非允當須議改更宜令應州縣官所招添到戶口課績

自今日已前罷任者並準天福八年三月十一日勅施行其漢乾祐三年七月二十五日勅不行起今後應罷縣令主簿招添到戶口其一千戶已下縣每增添滿二百戶者減一選三千戶已下縣每三百戶減一選五千戶已下縣每四百戶減一選萬戶已下縣每五百戶減一選並所有增添戶及租稅並須分明於厯子解由內錄都數若是減及三選已上更有增添及戶數者縣令與改服色已賜緋者與轉官其主簿與加階轉官

定皮革稅勅

累朝已來用兵不息至於繕治甲冑未免配役生靈取乃民資助成軍器就中皮革尤峻科刑稍犯嚴條皆抵極典鄉縣以之生事奸猾得以侵漁宜立新規用革前弊應天下所納牛皮令將逐年所納數三分內減放二分其一分於人戶苗畝上配定每秋夏苗共十頃納連角牛皮一張其黃牛納乾筋四兩水牛半斤犢皮不在納限其皮人戶自詣本州送納所司不得邀難所有牛馬騾皮筋角今後官中更不禁斷並許私家供使買賣只不得將出化外敵境仍仰關津界首子細覺察捕捉所犯人必加深罪其州

縣先置巡簡牛皮節級及朝廷先降條法一切停廢其合
分擘納黃牛水牛皮筋處其間有未盡事件委所司取便
處分庶免編民犯禁且使人戶資家旣便公私用除苛弊

欽定全唐文卷一百二十四目錄

周太祖 三

賜青州勅

宣慰麟州刺史楊仲訓勅

慮囚勅

令州縣軍鎮各守職分勅

禁習天文圖緯諸書勅

嚴究落第舉人騰謗並不得受薦託勅

命以天下縣戶口定望緊上中下次第勅

賜趙鳳自盡勅

即位赦文

平兗州大赦文

策禮樂兵刑問

請擒縛李業等疏

澶州上漢帝疏

請冊立嗣君疏

上漢太后牋

諭徐州城內軍民書

答北京留守劉崇書

賜鄴都副留守陳光穗詔書

幸兗州札

令所司備南郊儀注札

欽定全唐文卷一百二十四

周太祖 三

賜青州勅

勅青州在城及諸縣鎮鄉村人戶等朕臨御已來安民是切務除疾苦俾遂蘇舒據知州閤門使張凝近奏陳八事於人不便積久相承宜降指揮並從改正其一屬州營田後槽兩務所管課利斛斗錢物人戶牛具屯官等宜並割屬州縣官舊額稅課其務及職員並廢其課額內有紅花紫草茱萸麻等據時估納錢折絲絹亦不得其係官桑土

牛具什物並賜見佃人爲永業其城郭內宅舍房店奏取
進止其秋夏納稅區段不成端區者許人戶合端區不得
以零尺納錢其區並須本色不得邀納價錢改換色目如
省司品配不在此限其二省司元納夏秋稅區段每區納
十錢每貫七錢絲綿細線每十兩納耗半兩糧食每石納
耗一斗八錢蒿草每十束耗一束錢五分鞋每兩一錢此
外別無配率今後青州所管州縣並依省司則例供輸如
違罪無輕恕其三劉銖在任時於苗畝上每畝徵車腳錢
每頃配柴炭今後並止絕其四州司每年配和買稈草及

苦營草今後並止絕如有關三司指揮其五所徵食鹽錢
每貫別納腳錢今後止絕其六別徵進奏院糧課錢及遞
鋪錢鞋分配縣鎮今後並止絕要即於州司公用錢內支
遣其七州司配徵啖馬藥及汎配藥又縣鎮科配石炭紅
花紫草今後並止絕不得配率又州司於夏苗上配納麥
麴今後據州合用多少量於近縣配納不得遍據諸縣其
八舊例州縣供納夏秋租稅皆畢須追人吏到州勘會此
後止絕稅無欠少不得追集縣吏已前事件已降宣命處
分其屬郡淄登萊等州如有前項舊弊亦依青州例施行

宣慰麟州刺史楊仲訓勅

麟州刺史楊仲訓及軍州將吏職員等據夏州節度使李彝殷奏得汝等狀稱劉崇拒命聖朝堅其逆壘今被部族侵迫乞垂救解兼已稱大朝正朔并門逆命邊郡無歸值妖孽之脅從致朝貢之阻絕今則蕃部兵民助我討違汝等哀告蕃鄰欲謀歸向備覩變通之意特用宏納之仁宜示撫安用獎忠順已指揮州府及諸蕃部不令進攻汝等便宜明宣朝旨告諭軍民應是通河東道路口岸晝時遣人守禦不得通人來往凡有公事一一奏取朝廷指揮其

官員將校職掌一切依舊仍分析名銜申奏當議等第加恩兼之酬賞

慮囚勅

朕以時當化育氣屬炎蒸乃思縲紲之人是軫哀矜之念慮其非所案鞫淹延或枉濫窮屈而未得伸宣或飢渴疾病而無所控告以罪當刑者唯彼自召法不可移非理受苦者爲上不明安得無慮欽恤之道夙宵靡寧應諸道州府見繫罪人宜令官吏疾速推鞫據經遣斷不得淹滯仍令獄吏灑掃牢獄常令虛歇滌洗枷械無令蚤虱供給水

漿無令飢渴如有疾患令其家人看承囚人無主官差醫
工診候勿致病亡循典法之成規順長羸之時令俾無淹
滯以致和平

令州縣軍鎮各守職分勅

賦稅婚田比來州縣之職盜賊煙火元係巡鎮之司各有
區分不相踰越或侵職分是紊規繩切慮所在職員尚循
舊弊須行條貫以正紀綱京兆鳳翔府同華邠鄜耀等州
所管州縣軍鎮頃因唐末藩鎮殊風久歷歲時未能釐革
政途不一何以教民其婚田爭訟賦稅丁徭合是令佐之

職其擒奸捕盜庇護部民合是軍鎮警察之職今後各守
職分專切提撕如所職疎遺各行按責其州府不得差監
徵軍將下縣庶期靜辦無使煩勞

禁習天文圖緯諸書勅

辰象元遠罕克精研術數幽深驟難窮究則有閭閻之內
小祝之流粗學陰陽務求衣食妄談休咎以誑民氓比設
律條止茲誕妄久疎法網是啟妖訛自今後元象品物天
文圖書識記七曜厯太一雷公式法等私家不合有及衷
私傳習見有者並須焚毀司天臺翰林院本司職員不得

以前件所禁文書出外借人傳寫其諸時日五行占筮之書不得禁限其年厯日須候本司算造奏定方得雕印所司不得衷私示外如違準律科斷遍下諸道州府各令告示

嚴究落第舉人騰謗並不得受薦託勅

國家開仕進之路設儒學之科較業掄才登賢舉俊其或藝能素淺履行無聞來造科場要求僥倖及當試落便起怨嗟謗議沸騰是非蜂起至有偽造制勅之語扇惑儕流巧爲誣毀之言隱藏名姓以茲取事得非薄徒宜立憲章

以示澄汰其禮部貢院條奏宜依仍於引試之時精詳考校逐場去留無藝者雖應年深不得饒僭場數若有藝者雖當黜落並許訴陳祇不得於街市省門故爲喧競及投無名文字訛毀主司如有故違必行嚴斷本司鑠宿後御史臺開封府所差守當人專切覺察其有不自苦辛祇憑勢援潛求薦託俯拾科名致使孤寒滯於進取起今後主司不得受薦託書題如有書題密具姓名聞奏其舉人不得就試今後舉人須取本鄉貫文解若鄉貫阻隔祇許兩京給解

命以天下縣戶口定望緊上中下次第勅

天下縣邑素有等差歷年月以既深或增損之不一其中有戶口雖衆地望則卑地望雖高而戶口至少每至調集不便銓衡及有久歷官途却授隘狹之縣纔昇仕進便臨繁庶之民宜立成規庶叶公共應天下縣除赤縣畿縣次赤次畿外其餘三千戶已上爲望縣二千戶已上爲緊縣一千戶已上爲上縣五百戶已上爲中縣不滿五百戶爲中下縣選人資敘合入下縣者今許入中下縣宜令所司據今年天下縣戶口數定望緊上中下次第聞奏

賜趙鳳自盡勅

趙鳳驟承委寄合稟憲章臨民不力於撫綏率性但聞於凶暴沿淮巡寇當年之殘忍難名近郡頒條在任之貪虐尤甚奪部民之妻女率州戶之資財招納賊徒騷擾生聚爾不奉法國有常刑其趙鳳宜削奪在身官爵賜自盡

即位赦文

自古受命之君興邦建統莫不上符天意下順人心是以夏德既衰爰啟有商之祚災風不競肇開皇魏之基朕早事前朝久居重位受遺輔政敢忘伊霍之忠仗鉞臨戎復

委韓彭之任匪躬盡瘁焦思勞心討叛渙於河潼張聲援
於岐雍竟平大憝粗立微勞纔旋旆於關西尋統兵於河
北訓齊師旅固護邊陲只將身許國家不以賊遺君父外
憂少息內患俄生羣小連謀大臣遇害棟梁既壞社稷將
傾朕方在藩維亦遭讒構逃一生於萬死徑赴闕庭梟四
罪於九衢幸安區宇將延漢祚擇立劉宗徵命已行軍情
忽變朕以衆庶所迫逃避無繇扶擁至京尊戴爲主重以
中外勸進方嶽推崇黽勉雖順於羣心臨御實慙於涼德
改元建號祇率於舊章革故鼎新宜覃於霈澤朕本姬室

之遠裔號叔之後昆積慶累功格天光表盛德既延於百世大命復集於眇躬今建國宜以大周爲號改乾祐四年爲廣順元年自正月五日昧爽已前應天下見禁人等罪無輕重已發覺未發覺已結正未結正常赦所不原者咸赦除之故漢樞密使楊邠侍衛都指揮使史宏肇三司使王章等以勞定國盡節致君千載逢時一旦同命悲感行路憤結重泉雖尋雪於沈冤宜更申於渥澤並可加等追贈備禮歸葬喪事官給仍訪子孫敘用其餘同遭枉害者亦與追贈馬步諸軍將士等勦力協誠輸忠效義先則戡

平內難後乃推戴朕躬言念勲勞所宜旌賞其員僚將士等各與等第超加恩命仍賜功臣名號已有功臣名號者別與改賜應左降官量加敘錄亡官失爵之人宜與齒用配流徒役人並許放還已歿者任從歸葬所有杜仲威李守貞王景崇趙思綰賓幕元隨親戚及諸色人先因懼罪至今逃匿者並可放還任自取便昨者犯罪人蘇逢吉劉銖閻晉卿李業後贊聶文進郭允明及同時犯罪人等家族骨肉先已釋罪疏放其逐人所有親戚及門客元隨職掌在諸處者切慮尚抱憂疑今並釋放所在不得更有恐

勳內有手下先管莊田錢穀人等已下三司點簡磨勘了
日一任逐便諸處有犯罪逃亡之人及山林草寇等咸許
自新一切不問各還鄉里自務營生仍仰所在切加安卹
所繇節級不得衷私妄有恐動如赦到後一月不歸本業
者復罪如初内外文武臣僚致仕官諸軍將校隨使職員
及前任藩侯郡守文武朝列前內諸司使副使前禁軍指
揮使前資行軍副使等各與等第加恩應見任文武臣僚
內諸司使諸道行軍副使藩方馬步軍都指揮使如父母
在未有恩澤者即與恩澤如亡歿未曾追封贈者亦與封

贈已封贈者更與封贈晉漢以來兵革屢動賦役煩併黎庶瘡痍鰥寡孤惻不能自濟爲人父母曾不閔傷應天下州縣所欠乾祐元年二年已前夏秋殘稅及派徵物色并三年夏稅諸色殘欠並與除放所有澶州已來大軍經過之時沿路人戶恐有蹂踐兩邊共二十里并乾祐三年殘欠秋稅並放應河北沿邊州縣自去年九月後來曾經契丹蹂踐處其人戶應欠乾祐三年終已前積年殘欠諸色稅物並與除放仍委逐處長吏倍加存撫至於防守邊塞優卹疲羸利害之事各宜條奏自前或有拒扞契丹顯立

功勞及將吏之中有歿於王事者具名以聞當議酬獎應
係三司主持錢穀敗闕場院官取乾祐元年終已前徵納
外累經較科灼然無抵當者委三司分析聞奏別候指揮
秋夏徵科舊有規制如聞諸道州府別立近限催驅或緣
逼蹙過深轉致供輸不易至使蠶欲老而求絲債禾未熟
而取穀錢但無逋懸何須急暴應天下百姓納稅租並取
省限內納畢不任促限徵督如是軍期急速即不拘此例
訪聞諸處人戶逃移在外者自前省司雖累行招攜多未
歸復兼知逃戶稅賦攤配居人公私之間未甚允當念其

疾苦常軫於懷宜令所司商量別行條貫庶使逃移者即歸鄉土見居者漸遂舒蘇免困生靈以副勤恤藩侯郡守寄任非輕立政之先養民爲本每及徵賦尤要徇公其逐處倉場庫務宜令節度使刺史專切鈐轄掌納官吏一依省條指揮不得別納斗餘秤耗舊來所進羨餘物色今後一切停罷朕早在藩鎮嘗戒奢華今御寰區尤思節儉況國家多事帑藏甚虛將緩憂勞所宜省約應乘輿服御之物不得過爲華飾宮闈器用並從樸素太官常膳一切減損諸道所有進奉皆助軍國支費其珍巧纖華及奇禽異

獸鷹犬之類不得輒有貢獻諸無用之物不急之務並宜
停罷帝王之道德化爲先崇飾虛名朕所不取苟致治之
未洽雖多瑞以奚爲今後諸道所有祥瑞不得輒有奏獻
古者用刑本期止辟今茲作法義切禁非蓋承弊之時非
猛則姦凶難制及知勸之後在寬則典憲得宜相時而行
庶臻中道今後應犯盜賊及和姦者並依晉天福元年已
前條制施行應諸犯罪人等除叛逆罪外其餘罪並不得
籍沒家產誅及骨肉一依格令處分天下諸侯皆有親校
自可慎擇委任必當克效參裨朝廷選差理或未當宜矯

前失庶協通規其先於在京諸司差軍將充諸州郡元從都押牙孔目官內知客等並可停廢仍勒却還舊處職役設官分職具列司存離局侵權誠爲撓紊今後諸司公事並須各歸局分不得越次施行朝廷之務顯有舊章職官具存安可廢墜如聞自前諸司公事多有壅滯今後並可速疾舉行國之大事在祀爲先苟爽吉蠲深爲瀆慢如聞自前祠祭牢饌頗虧肅敬今後委監察御史嚴加覺察必須豐潔庶達精誠稍或不恭國有常典近代帝王所在陵寢合禁樵採俾奉神靈唐莊宗晉高祖各置守陵十戶以

近陵人戶充漢高祖皇帝陵署職員及守陵宮人時月薦饗並守陵人戶等一切如故仍以晉漢之裔爲二王後委中書門下處分自古聖帝明王莫不好賢納諫是以立誹謗之木采芻蕘之言時之利病罔不知政之得失無不察達聰明目其在茲乎應内外文武臣寮有見識灼然益於治道者許非時上章聞達山林草澤之間懷才抱器之士切在搜訪免致遺賢孝子順孫義夫節婦所宜旌表以勵時風於戲致理保邦非德教無以安萬國發號施令非誠信無以示四方其或言出行違朝行暮改是爲秕政何以

子民更賴棟梁羽翼之臣左右前後之士共扶寡昧同致
雍熙思寘器以永安覩覆車之可戒納隍馭朽予豈忘諸
釐革有所未盡者有司具啟請以聞

平兗州大赦文

在昔哲王承天育物莫不內修庶政外撫諸侯推誠以待
人人皆自信虛已以馭下下無弗從是以車書大同革兵
不試動植遂和平之性蒸黎絕愁嘆之聲朕以眇躬猥承
大統側微自效嘗從軍旅之中億兆所推獲託王公之上
涉道斯淺於德未章致其毒螫之凶爲我生靈之患逆賊

慕容彥超輿臺賤類闢茸微人厯郡牧而至藩侯扇貪風而彰惡迹泊予臨馭無閒綏懷而乃顛越不恭姦邪是恣北則結連戎虜南則臣事淮夷每與劉崇潛通人使剖割萬姓傷殘乃杼軸其空盜橫一州嚴酷如爐炭之上招呼亡命剽劫隣封繕甲治兵深溝高壘旣顯悖違之狀須興討伐之師朕昨暫御戎車來巡軍寨覩貔貅之賈勇憤蛇豕以爲妖咸請先登不容假息士怒未洩逆壘俄平盜泉已涸其源流惡草盡除其滋蔓班師振旅六軍方樂於凱旋盪穢滌瑕一境宜覃於霈澤可赦兗州管内取五月二

十七日見禁罪人及未發覺者大辟以下並赦除元凶流毒同黨濟姦國有常刑皆合顯戮特示好生之道猥寬連坐之誅應曾與慕容彥超同惡之人逃避潛藏者並與釋放仰於所在自出陳首百日不首者獲罪如初應已伏誅逆黨人等於諸處有骨肉者先已指揮放罪招安尚慮本身抵法之後却有驚疑宜令所在州縣明行告諭並釋放不問兗州城內幕職及州縣官吏軍府將校令並放罪其衙前州使兩院職役人本城軍都並勅仍舊自慕容彥超違背已來鄉州山寨豪強人等接便爲非劫掠擄殺今因

收復並與洗滌一切不問外諸軍將士等勇於爲主奮不顧身所有沒於王事者各等第給布絹仍以本人半分衣糧與本家一年有親子者官中並與收錄安排自軍使都頭以上皆與贈官職賊據一城民殘四境或撤毀其牆屋或蹂躪其田疇槩於徵取供軍點集應役並宜矜恤俾漸蘇舒應兗州城內所有徵取今年屋稅及蠶食鹽鐵諸雜稅物並與除放城外官軍下寨處四面去州城五里內所毀今年夏稅苗子蠶食鹽鐵並諸雜沿徵錢物並與除放五里外十里內除放今年夏苗子三分中減放一分并兗

州城內百姓被慕容彥超閉門已來無辜殺害者宜令本
州存恤其家其被殺官員宜令本州官具錄奏聞當行恩
澤所有被毀拆却舍屋極多及收城之時延火燒熱官中
給賜材木重令蓋造攻取城池須資力役既臨矢石或致
喪亡致人歿身在朕深念諸州差別人夫內有遭矢石身
死者宜令逐州縣分析姓名聞奏官中各給絹三匹以省
庫物充仍放下三年諸雜差遣勒本縣給與文帖其部領
人夫州縣官等到城下施功者據勞役日月等第加減選
萊蕪監所抽點到諸縣義軍已各指揮放散今後更不得

管係名額其權充都將節級者亦不得此後於鄉村內更有稱呼於戲夏爲長贏勞軍民以從役聖職教化用干戈而翦凶惟予不明增愧於是尚賴穹旻之祐漸期寰海之安告爾魯人咸體茲意

策禮樂兵刑問

王者以禮御人倫以樂和天地以兵柔萬國以刑齊兆民四者何先殊途同治或因或革各適所宜故五帝殊時不相襲禮三王異世不相沿樂兵有務戰不戰之異刑有輕次重次之差歷朝張弛繁不具引自唐祖混一函夏太宗

嗣成聖功言其禮則三正有常言其樂則七宗有秩兵息而臣道咸順刑措而民心不渝五帝三王不足尚也越自天寶之後國經混然禮樂湮墜而衆不知兵刑煩擾而下不畏朱梁晉漢皆用因仍洎我朝開創以來力務興振然薰歇燼滅歷年滋多焦思勞神觀效未著予欲父慈子孝兄友弟恭君仁臣忠夫義婦聽聲明文物無其缺祝嘏辭說必有序萬儀咸秩百神受職家肥國肥知禮之尊也當用何理副茲虛懷予欲六律六呂七政九變金石絲竹之器羽旄干戚之容歌其政舞其德與夫文音武坐比崇昔

時天和地平知樂之崇也子當深辨其理爲時陳之予欲
混同天下親征未服手振金鼓跋履山川如商高宗之伐
鬼方若魏武帝之登柳塞則六師所至供億無窮衆興民
勞自古皆慎若但任偏將屯於邊鄙縱兵時入茹食居人
交尸塞路暴骨盈野終歲如是得無憫然何以令佳兵不
具彼魁革面王塗無所圯隔方貢自來駿奔更思爾謀以
逮明略予欲斧鉞不用刀鋸不興桎梏朽蠹無所設施無
城舂鬼薪之役無三居五宅之流畫衣冠而不犯虛囹圄
而不入措刑之理何以致諸子大夫博義洽聞窮微覩奧

提筆既于奇遇撞鐘必應於嘉音抱屈將伸直言勿隱
請擒縛李業等疏

昨爲兵士擁至河上言京中誅史宏肇等盡非聖意請陛下密詔內班擒縛李業等送至澶州詔諭兵士臣即却歸
鄴中一則雪將相之深冤一則安陛下之家國

澶州上漢帝疏

臣發迹寒賤遭遇聖朝既富且貴實過平生之望唯思報
國敢有他圖今奉詔命忽令郭崇等殺臣即時俟死而諸
軍不肯行刑逼臣赴闕令臣請罪上前仍言致有此事必

是陛下左右譖臣耳今驚脫至此天假其便得伸臣心三五日當及闕朝陛下若以臣有欺天之罪臣豈敢惜死若實有譖臣者乞陛下縛送軍前以快三軍之意則臣雖死無恨今託驚脫附奏以聞

請冊立嗣君疏

昨者左右熒惑輿駕蒼皇歸闕師徒未免驚動帝王出令其位難虛軍國事多早宜冊立嗣君以係人望伏請太后行教令指揮

上漢太后牋

臣事先帝過承君父之恩及奉嗣君願竭腹心之效豈期禍難事與願違方擇當璧之賢又爽大橫之兆永言膝下何慰慈顏望太后以宗子待微臣臣敢不奉宗廟如本朝事太后爲慈母悃款之至祈懇增深

諭徐州城內軍民書

昨以輦廷美楊溫等不認朝旨妄蓄疑心累令招攜明示誠信雖有章奏尚未開門既無果決之心必是疑君之計今以指揮王彥超排比大軍攻討汝等若能誅斬元惡應接官軍上城者若是將校員寮只與超拜官資兼授刺史

百姓即給厚賞穩便安排但收此絹書以爲憑信

答北京留守劉崇書

朕在澶州之時軍情推戴之際先差來直省李光美備見
必想具言而況遐邇所聞在後盡當知悉湘陰公比在宋
州駐泊見令般取赴京但勿憂疑必令得所唯公在彼固
請安心若能同力扶持別無顧慮即當便封王爵永鎮北
門鐵契丹書必無愛惜其諸情素並令來人口宣

賜鄴都副留守陳光穗詔書

汝澶淵倖職之時值漢室覺生之際潛齋密旨將陷朕躬

神明不祐於包藏機事尋當於發露汝稟勲賢之指使效奔走之勤勞徑自河壩報於鄴下忠孝之規迴著旌酬之道未宏每慊朕懷仍宣公論宜膺列郡用賞前功今授汝博州刺史

幸兗州札

昨以慕容彥超違負國朝閉據城壘尚稽顯戮未快羣情方屬炎蒸正勞師旅朕恭臨萬國深居九重處宮闕之清虛雖然遂性念將士之勤苦寧免疚心暫自省巡往申慰撫況非遠路不至甚勞凡我臣寮當體茲意朕取五月五

日進發離京赴兗州城下慰勞行營將士沿路側近節度防禦團練使刺史不得離本州府來赴朝覲其隨駕一行供頓並取係省錢物準備差使臣勾當仍預告報一路州縣並不得別有排比其隨從臣寮內外諸司官中已有供給州縣亦不得別有破費祇供其要載動用什物車乘亦已指揮備辦如闕少之時候見宣命即行供應只不得預前排比如衷私有人小小取索並不得應付或軍都及諸色人於路途店肆買所須什物先還價錢兩京留守百官只於遞中附表起居時熱不用差官至行在所沿路指揮

事件車駕迴日亦依此施行

令所司備南郊儀注札

王者應運開基子民育物罔不承天事地尊祖敬宗燔柴於泰壇用昭乾德瘞玉於方澤以答坤靈朕受命上元宅心下土時已歷於三載漸至小康禮未展於二儀深虧大典夙宵愧畏不敢遑寧宜叶著龜式陳邊豆庶展吉蠲之禮用傾昭事之誠朕以來年正月一日於東京有事於南郊宜令所司各備儀注務從省約無致勞煩凡有供需并用官物府縣不得因便差配諸道州府不得以進奉南郊

爲名輒有率斂庶俾嚴靜以奉郊禋中外臣寮當體予意